

## REGLUGERÐ

### um niðurfellingu eða endurgreiðslu aðflutningsgjalda af vörum sem endursendar eru til útlanda.

#### I. KAFLI

##### Um niðurfellingu aðflutningsgjalda.

###### 1. gr.

Heimilt er að heimta ekki aðflutningsgjöld af ótollafgreiddri vöru í vörslu farmflytjanda sem ekki hefur verið vitjað, viðtakandi hefur ekki fundist að eða neitað hefur verið viðtöku á og endursend er til útlanda, enda sé við endursendingu fullnægt eftirtöldum skilyrðum:

1. Lögð sé fram hjá viðkomandi tollyfirvaldi skrifleg beiðni á þar til gerðu eyðublaði um tollskoðun á þeirri vöru sem senda á til útlanda, svo og viðurkenning eða skrifleg beiðni hins erlenda seljanda um endursendingu hennar, ásamt nauðsynlegum tollskjölum hafi þau ekki þegar verið afhent.
2. Sett sé full fjártrygging fyrir áföllnum aðflutningsgjöldum.
3. Tollgæslan staðfesti skriflega skoðun vöru og umbúða svo og flutning hennar undir tolleftirliti um borð í útflutningsfar. Ef vara er eigi þegar að skoðun lokinni flutt um borð í útflutningsfar skal innsíglun hennar staðfest af tollgæslu. Við síðari flutning hennar undir tolleftirliti um borð í útflutningsfar skal tollgæsla staðfesta að innsigli hafi reynst heil og órofin.
4. Farmflytjandi staðfesti skriflega útflutning vörunnar og láti fylgja til staðfestingar afrit af útflutningsfarmskirteini ásamt hleðslukvittun.
5. Framangreind staðfestingargögn skulu afhent viðkomandi tollstjóra innan mánaðar frá brottför þess flutningafars sem flutti vöruna til útlanda, enda skal þá gerð upp fjártrygging sem sett var samkvæmt 2. tl. Nú afhendir sendandi ekki viðkomandi tollstjóra framangreind staðfestingargögn innan hins tilskilda frests og skal þá sett fjártrygging tekin upp í áfallin og ógreidd aðflutningsgjöld.

Niðurfelling aðflutningsgjalda skv. 1. mgr. skal því aðeins heimil að ekki líði lengri tími en eitt ár frá því að vara kom til landsins og þar til hún er endursend úr landi.

###### 2. gr.

Heimilt er að heimta ekki aðflutningsgjöld af vöru sem sett hefur verið í tollvörugeymslu, enda sé hún endursend til útlanda innan þriggja ára frá komudegi vörunnar til landsins og fullnægt sé þeim skilyrðum sem tilgreind eru í 1.—5. tl. 1. gr.

#### II. KAFLI

##### Um endurgreiðslu aðflutningsgjalda.

###### 3. gr.

Heimilt er að endurgreiða aðflutningsgjöld af vöru sem send er aftur til útlanda ónotuð í því ástandi sem hún var er hún var flutt hingað til lands, enda hafi hún ekki verið boðin fram til sölu, viðurkenning (kvittun) viðskiptabanka um gjaldeyrisskil sé lögð fram og fullnægt sé að öðru leyti þeim skilyrðum sem tilgreind eru í 1., 3. og 4. tl. 1. gr.

Staðfestingargögn skv. 1., 3. og 4. tl. 1. gr. skulu afhent viðkomandi tollstjóra innan mánaðar frá brottför flutningsfars sem flutti vöruna til útlanda.

Endurgreiðsla aðflutningsgjalda skv. 1. mgr. skal því aðeins heimil að ekki

líði lengri tími en eitt ár frá því að vara kom til landsins og þar til hún er endursend úr landi.

4. gr.

Heimilt er að endurgreiða aðflutningsgjöld af vélum sem reynast gallaðar, enda hafi gallar komið fram við notkun vélanna og ekki fyrr verið hægt að ganga úr skugga um þá.

Endurgreiðsla aðflutningsgjalda skv. 1. mgr. skal því aðeins heimil að fullnægt sé skilyrðum 1., 3. og 4. tl. 1. gr. svo og 2. mgr. 3. gr. auk eftirtalinna skilyrða:

1. Lögð sé fram viðurkenning seljanda vélanna um að hann taki þær aftur vegna gallanna.
2. Aðflutningsgjöld nemi ekki lægri fjárhæð en 5 000 kr.
3. Endursending fari fram innan sex mánaða frá komu vélanna til landsins.

III. KAFLI

Ýmis ákvæði.

5. gr.

Auk þeirra skilyrða sem sett eru samkvæmt 1.—4. gr. skulu endursendendur vara, eftir því sem við á, uppfylla almenn skilyrði um útflutning skv. ákvæðum VIII. kafla laga nr. 59/1969 um tollheimtu og toleffirlit.

6. gr.

Tollstjórar, hver í sínu umdæmi, annast endurgreiðslu eða niðurfellingu aðflutningsgjalda samkvæmt reglugerð þessari.

Fyrir hverja vörusendingu, sem endursend er til útlanda skv. 1.—5. gr., skal greiða tollskoðunargjald.

7. gr.

Reglugerð þessi er sett samkvæmt 57. gr., sbr. 52. gr., og 8. gr. laga nr. 59 28. maí 1969 um tollheimtu og toleffirlit til að öðlast gildi þegar í stað. Jafnframt er felld úr gildi 72. gr. reglugerðar nr. 41 13. mars 1957 um tollheimtu og toleffirlit.

*Fjármálaráðuneytið, 22. september 1977.*

F. h. r.

Jón Sigurðsson.

*Dorsteinn Geirsson.*

12. ágúst 1977.

Nr. 338.

**Staðfesting forsetans** á skipulagsskrá fyrir Sjúkra- og slysatryggingasjóð Júdódeildar U. M. F. K., útgefin á venjulegan hátt að mandatum af dómsmálaráðherra 12. ágúst 1977.

Skipulagsskráin er þannig:

**SKIPULAGSSKRÁ**

fyrir Sjúkra- og slysatryggingasjóð Júdódeildar U. M. F. K.

1. Nafn sjóðsins er Sjúkra- og slysatryggingasjóður Júdódeildar U. M. F. K.
2. Tilgangur sjóðsins: Að styrkja meðlimi deildarinnar í slysa og veikindatilfellum eftir því sem nánar er kveðið á um í reglugerð þessari. Stjórn sjóðsins er heimilt að endurtryggja sjóðinn.